

貞蛻鳴

鶴

居巖

餘

詞詞音





蛻

巖

詞

張
翥
著

中
華
書
局

蛻巖詞

此據知不足齋叢
書本排印初編各
叢書僅有此本

蛻巖詞卷上

河東 張 翥 仲舉 著

六州歌頭

孤山尋梅

孤山歲晚。石老樹查牙。逋仙去。誰爲主。自疎花。破冰芽。烏帽騎驢處。
近修竹。侵荒蘚。知幾度。踏殘雪。趁晴霞。空谷佳人。獨耐朝寒峭。翠袖
籠紗。甚江南江北。相憶夢魂賒。水繞雲遮。思無涯。又苔枝上。香痕
沁。么鳳語。凍蜂衙。瀛嶼月。偏來照。影橫斜。瘦爭些。三好約尋芳客。問前
度。那人家。重呼酒。摘瓊朶。插鬢鴉。喚起春嬌扶醉。休孤負錦瑟年華。
怕流芳不待。回首易風沙。吹斷城笳。

瑞龍吟

癸丑歲冬 訪游宏道樂安山中。席賓米
仁則。用清真詞韻賦別。和以見情。

鰲溪路。瀟灑翠壁丹崖。古藤高樹。林間猿鳥欣然。故人隱在。溪山深
處。久延佇。渾似種桃源裏。白雲窗戶。燈前素瑟清尊。開懷正好。連

牀夜話。應是山靈留客。雪飛風起。長松掀舞。誰道倦途相逢。傾蓋如故。陽春一曲。總是關心句。何妨共磯頭把釣。梅邊徐步。只恐匆匆去。故園夢裏。長牽別緒。寂寞閑針縷。還念我飄零江湖烟雨。腸斷歲晚。客衣誰絮。

多麗 爲友生壽所見

小庭階。簾櫳婀娜蓬萊。恨匆匆歸鴻度影。東風搖蕩情懷。不多時見他行過。霎兒後依舊迴來。銀鋌雙鬟。玉絲頭道。一尖生色合歡鞋。麝香粉繡茸衫子。窄窄可身裁。偶回頭。笑渦透臉。蟬影籠釵。憶疎狂隨車信馬。那知淪落天涯。荳蔻初可憐春早。菖蒲晚難見花開。紅葉波深。綵樓天遠。浪憑青鳥信音乖。等閒是這番迷眼。無處可安排。行雲斷。夢魂不到。空賦陽臺。

鳳凰簫。新聲遠度蘭橈。漾東風。湖光十里。參差綠蓋紅橋。暖雲蘸鬱
金衫色。晴烟抹翡翠裙腰。罨畫名園。闌紅芳榭。蒲葵亭畔。綵繩搖。滿
鴛鴦落英堪藉。猶作殢人嬌。漬羅袂。莫揉痕退。生怕香銷。憶當年
尊前扇底。多情冶葉倡條。浴蘭女。隔花偷盼。修禊客。臨水相招。舊約
尋歡。新聲換譜。三生夢裏。可憐宵。縱留得。楝花寒在。啼鴂已無聊。江
南恨。越王臺下。幾度迴潮。

多麗

西湖汎舟夕歸。施成大席上。
以晚山青爲起句。各賦一詞。

晚山青。一川雲樹冥冥。正參差烟凝紫翠。斜陽畫出南屏。館娃歸吳
臺遊鹿。銅仙去。漢苑飛螢。懷古情多。憑高望極。且將尊酒慰飄零。自
湖上愛梅仙遠。鶴夢幾時醒。空留在。六橋疎柳。孤嶼危亭。待蘇堤
歌聲散盡。更須攜妓西泠。藕花深雨涼翡翠。菰蒲軟風弄蜻蜓。澄碧
生秋。闌紅駐景。采菱新唱最堪聽。□一片水天無際。漁火兩三星。多

情月爲人留照。未過前汀。

蘭陵王 臨川寓舍·聞箏·

晚風惡。牆外楊花正落。鞦韆罷。人在瑣窗。猶怯春寒下簾幙。多情倦
繡作。恰了棠梨半萼。移金雁。應是自調。盡寄深情與絃索。數聲白
翎雀。又歇拍多時。嬌甚彈錯。新聲舊譜多忘却。想紅香憔悴。錦書遼
邈。匆匆前度見略略。甚如在天角。霧閣閉銀鑰。奈夢斷行雲。青鳥
難託。三生書記情緣薄。記舊家歌舞。那時行樂。桃枝人面。問酒家。負
舊約。

摸魚兒

送黃任伯歸豐城·時任伯
先放其妾還家·故及·

正匆匆。楚鄉秋晚。孤鴻飛過南浦。同來桃葉堪惆悵。一舸載春先去。
愁絕處。問那曲闌干。曾聽人低語。今宵最苦。向楓樹溪橋。蘆花野館。
翦燭臥聽雨。吳霜鬢。破帽西風怎護。絲絲都是離緒。舊情頓冷新

愁重。總付墜鞭詞譜。君記取。待雪夜相思。乘興柴岡路。唱予和汝。要款段隨車。輕盈喚酒。重爲國香賦。

摸魚兒

臨川春遊。連日病酒。賦此止之。

過花朝。淡烟輕雨。東風還又春社。客懷不斷還家夢。只泥酒杯陶寫。孤館夜。甚濃醉無人知道歸來也。蘭燈半地。任賦就魚牋。絃拋玉軫。誰念倦司馬。長安市。幾度攜尊命駕。空驚遊興衰謝。醉鄉天地無今古。爭得一襟蕭灑。春縱冶。便不飲從教團雪揉花打。觥籌已罷。笑螺贏螟蛉。吾今眞止。爲報獨醒者。

摸魚兒

春日。西湖泛舟。

漲西湖。半篙新雨。麴塵波外風軟。蘭舟同上鴛鴦浦。天氣嫩寒輕暖。簾半捲。度一縷歌雲。不礙桃花扇。鶯嬌燕婉。任狂客無腸。王孫有恨。莫放酒杯淺。垂楊岸。何處紅亭翠館。如今遊興全懶。山容水態依

然好。惟有綺羅雲散。君不見歌舞地。青蕪滿目成秋苑。斜陽又晚。正落絮飛花。將春欲去。目送水天遠。

摸魚兒

題熊伯宣藏梅花卷子

記西湖水邊曾見。查牙老樹如此。冰痕冷沁苔枝雪。的皪數花纔試。天也似。愛玉質清高。不入閒紅紫。孤山處士。總賦得招魂。烟荒雨暗。寂寞抱香死。春風筆。休憶深宮舊事。添人多恨多思。墨池雪嶺三生夢。喚起縞衣仙子。仍獨自。伴瘦影黃昏。和月窺窗紙。聲聲字字。寫不盡江南。閒愁萬斛。訴與綠衣使。

摸魚兒

王季境湖亭。蓮花中雙頭一枝。遊子同賞。而爲人折去。季境慨然請賦。

問西湖舊家兒女。香魂還又連理。多情欲賦雙蕖怨。閒却滿奩秋意。嬌旖旎。愛照影紅妝。一樣新梳洗。王孫正擬。喚翠袖輕歌。玉簫低按。涼夜爲花醉。鴛鴦浦。淒斷凌波夢裏。空憐心苦絲脆。吳娃小艇應

偷采。一道綠萍猶碎。君試記。還怕是西風。吹作行雲起。闌干謾倚。便載酒重來。尋芳已晚。餘恨渺烟水。

摸魚兒 賦湘雲

問湘南有雲多少。不應長是爲雨。平生宋玉緣情老。贏得鬢絲如許。歌又舞。更一曲琵琶。昵昵如私語。閒悲浪苦。怪舊日青衫。空流淚滿。不解畫眉嫵。空凝佇。十二峯前路阻。相逢知在何處。今朝重見春風手。仍聽舊彈金縷。君且住。怕望斷蘅皋。日暮傷離緒。新聲自譜。把江北江南。今愁往恨。盡入斷腸句。

摸魚兒

元夕。吳門姚子章席上。同阿敬仲賦。敬仲以虞學士書風入松子羅帕作軸。故末語及之。楚芳。吳閨。二妓名。

記蘇臺舊時風景。西樓燈火如畫。嚴城月色依然好。無復綺羅遊冶。歡意謝。向客裏相逢。還有思陶寫。金樽翠罇。把錦字新聲。紅牙小拍。分付倦司馬。繁華夢。喚起燕嬌鶯姘。肯教孤負元夜。楚芳玉潤吳

蘭媚。一曲夕陽西下。沉醉罷。君試問人生。誰是無情者。先生歸也。但留意江南。杏花春雨。和淚在羅帕。

摸魚兒

錢萬戶宜之。邀予賦瑤室景。

甚瑤臺翠鸞雛小。風流占斷妍景。數聲何處啼春勝。簾捲曉窗人靜。天氣困。梳未穩。綠鬟倭墮臨妝鏡。爛羞倦整。待鉸箇金花。眉尖雙雁。還怯翦刀冷。仙家好。十二行雲路迥。牢籠芳夢不定。多情正要人拘管。無奈綠昏紅暝。乘酒興。攜兩袖天風。飛上蓬萊頂。闌干獨凭。爲喚玉笙來。霓裳按舞。和月醉花影。

金縷詞

送王季境還廣陵

西子湖邊路。看依然。水光山色。自宜晴雨。天上歸來重載酒。惟有舊盟鷗鷺。笑鬢影。星星如許。公子華筵涼似水。更綠鬟窈窕。歌金縷。留晚醉。看眉嫵。三生書記真豪舉。把平生香奩軟語。錦囊佳句。君到

淮南明月夜。爲問崔娘安否。□翻作錦箏新譜。只恐驚鵲花外起。趁行雲直過蒼江去。飛不到斷腸處。

金縷詞 送上官子東之崑山州幕官

烟草長洲苑。渺姑蘇舊遊麋鹿。歲華云晚。多少吳宮花月恨。春去春來不管。只付與行人淒斷。君去風流賓幕裏。把今情古意供裁翦。珠唾溼。玉烟煖。相逢儘看金杯滿。信人生好懷有幾。夢長緣短。白髮嵒嶮三千丈。底用雲揉雨染。且鬪取尊前強健。爲問浮槎還到否。便乘之直上三山遠。看瀛島。水清淺。

沁園春 讀白太素天籟集。戲用韻。效其體。

客汝知乎。載酒輕舟。看花小車。勝炎州出使。瘴浮征旆。禁門待漏。霜滿朝韉。歲去堂堂。老來冉冉。瓶雀飛時手怎遮。平生事。歎山林迹遠。霄漢程賒。從渠夢蝶疑蛇。得放嬾還須自在些。甚天荒地老。銅臺

歌舞。水流雲散。金谷豪奢。客問先生。歸宜早計。醉後之言可信耶。鵬盟在。任漁蓑江上。雨細風斜。

沁園春 泉南初度。伯時將北歸。諸友宴次。賦此留別。

天上玉堂。海外瀛洲。山中蛻巖。甚六十四歲。出持使節。八千餘里。來駐征驂。香火緣深。功名意薄。夢覺仙家雪滿簪。桐花社。喜酒邊鶯燕。詩外雲嵐。錦堂容我清酣。擁畫燭金鉤。手屢探。怪朗吟御史。笑回紅粉。送歸司馬。淚溼青衫。蜀魄春多。塞鴻秋遠。無限離情老不堪。空留在水光山色。江北江南。

沁園春 廣陵九日。與劉士幹成元璋泛舟邗溝。

何許登臨。路繞蕪城。岡連楚臯。愛流雲低響。歌催瓊樹。微波照影。人豔仙桃。松院移尊。柳橋攜袖。隨處蘭舟且暫捎。秋無際。望空江雁遠。落木天高。不妨左手持螯。更右把金尊。送濁醪。歎雞臺草暗。淒然

興廢。龍山烟冷。老矣英豪。白髮寧饒。黃花任一作插。要裏西風破帽牢。
劉郎醉。把吳箋笑擘。試與題糕。

沁園春 次韻李元之。聽董氏雙絃。

誰喚嬌嬌。斜插雙絃。華筵乍開。愛玉纖輕軋。半籠翠袖。歌喉緩引。暗
點鴛鞋。胡部新聲。樂工巧製。寫出龍沙馬上哀。哀何似。似離鸞驚起。
白雀飛來。丁寧擊節金釵。要細聽春風且慢催。正官商分犯。拽歸
雙調。伊州入破。擷徧三臺。畫扇香收。羅巾汗溼。愁是雲兜醉後回。花
間客。任一作鸞綃纏髻。更盡餘盃。

蘇武慢 對雪

凍雨跳空。朔雲屯地。陡覺夜寒無賴。誰從蔡闕。宴罷羣仙。一樣珮零
珠解。應喚馮夷。起舞回風。攪碎沙汀銀海。倚南窗清思盈襟。看盡整
容斜態。君試問白羽鳴絃。青貂束錦。千騎獵歸烟塞。何如倦客。蠟

屐枝筇。乘興竹邊梅外。隨處堪尋。賣酒人家。春渚水鄉挑菜。趁湖山晴曉吟魂。飛上玉峯瑤界。

蘇武慢 歲晚再雪。仍用前韻。

歲晚江空。雪飛風起。老境若爲聊賴。家人解事。準備深尊。旋遣夜窗寒解。萍梗孤踪。幻影浮生。萬里喜還閩海。但囊中留得詩篇。爛寫水情山態。真比似一箇冥鴻。南來北去。閱盡幾重關塞。名韁利鎖。絆殺英雄。都付醉鄉之外。惟不能忘。一舸吳淞。鱸膾鼓羹蓴菜。且今宵還我。冰壺天地。眼空塵界。

風流子

臨川歲五月祠神。以中末二句之六七八日張燈。游人特盛。回憶武陵元夕。

荷雨送涼颺。炎塵淨。三市影燈宵。看珠珞翠繩。猱搖冰盃。綵綳一作花架。光射星橋。洞天好。笑聲遮畫扇。歌韻合鸞簫。瓊樹影中。月窺端正。雲羅香裏。人鬪嬌嬈。依稀元夜影。銅壺短。還又露灑烟飄。空遣酒

懷搖蕩，羈思無聊。想驄馬鈿車，俊游何在。雪梅蛾柳，舊夢難招。醉掩重門，半缸蘭燼紅銷。

風流子

賞爭妓崔愛

梨園供奉曲，卿卿解寫入十三絃。聽促彈寶柱，暮催行雨，放嬌銀甲。春繞飛烟，可人處，鳳聲啼玉碎。燕尾點波圓。宜與畫看，微容妍麗，欲裁詩寄，鶯思纏綿。多情曾相遇，歸舟字夢裏，尙記遊仙。好倩鈿牀纖手，移近尊前。儘何處教吹玉簫明月。此情追憶，錦瑟華年。多少舊愁新恨，知爲誰傳。

疎影 王元章墨梅圖

山陰賦客，怪幾番睡起，窗影生白。縹緲仙姝，飛下瑤臺，淡貯東風顏色。微霜恰護朦朧月，更漠漠暝烟低隔。恨翠禽啼處，驚殘一夜夢雲無跡。惟有龍煤解染，數枝入畫裏，如印溪碧。老樹枯苔，玉暈冰圈。